



# MONTAGU

LAERSKOOL • PRIMARY SCHOOL

LANGSTRAAT, MONTAGU, 6720 • POSBUS / P.O. BOX 10, MONTAGU, 6720  
TEL: (023) 614 1640 - FAKS / FAX: (023) 614 3963 • E-POS / E-MAIL: monties@telkomsa.net

9 Oktober 2020

Geagte ouers

## **O/B: 25 Kennisgewing van begrotings- en algemene ouer jaarvergadering**

Dit is weer begrotingstyd! Teken asseblief nou reeds in u dagboek die begrotingsvergadering vir 2021 se begroting aan. Dit sal DV plaasvind op Donderdag, 12 November 2020, om 19:00 in die skoolsaal. Alle COVID-19 protokolle en prosedures sal gevolg word.

### Let asseblief op die volgende:

1. Die huidige skoolgeld beloop R9 900 vir die jaar. Met die huidige inligting tot ons beskikking, beoog die finansiële komitee van die beheerliggaam om 'n verhoging in werking te stel wat die skoolgeld vir 2021 op R10 560 (6.6%) te staan sal bring. Hierdie is 'n beraamde bedrag en kan moontlik verander.
2. Veertien dae voor die begrotingsvergadering (22 Oktober 2020) sal die volledige konsepbegroting by die skool beskikbaar wees vir insae.
3. Die agenda van die begrotingsvergadering sien as volg daarna uit:
  - Opening en verwelkoming
  - Voorlê van die begroting vir 2021 en bespreking
  - Goedkeuring van die begroting
  - Afsluiting
4. Dit is belangrik om daarop te let dat by hierdie vergadering 'n stemming sal plaasvind om die begroting deur die meerderheid ouers teenwoordig goed te keur. Die volgende punte sal as deel van die stemming goedgekeur word:
  - a. Dat skoolgeld ooreenkomstig die bepalings van artikel 38 en 39 (1) van die Suid-Afrikaanse Skolewet (hierna 'die Skolewet') vasgestel en gehef sal word.
  - b. Dat die begroting, soos wat die beheerliggaam voorstel, goedgekeur word, en dat die beheerliggaam gemagtig word om tekorte wat op begrote bedrae vir bepaalde begrotingsitems ontstaan, uit oorskotte aan te vul wat by ander items kan ontstaan, mits die totale begroting nie sonder goedkeuring van ouervergadering oorskry word nie.
  - c. Dat die voorgestelde aanstelling van bykomende personeel, en betalings ingevolge artikel 38A van die Skolewet, goedgekeur word.
  - d. Dat die skoolgeld betaalbaar sal wees ooreenkomstig die begroting wat deur die beheerliggaam voorgelê is.
  - e. Dat die volle uitstaande skoolgeld onmiddellik opeisbaar en betaalbaar word indien enige paalement nie teen die betaaldag betaal is nie.

- f. Dat alle ouers verplig sal wees om skoolgeld te betaal, tensy hulle ooreenkomstig die bepalings van die Skolewet, enige toepaslike regulasies én hierdie besluit van sodanige betaling vrygestel is.
- g. Dat ouers wat aanvoer dat hulle nie skoolgeld kan betaal nie, en daarom op algehele, gedeeltelike of voorwaardelike vrystelling van betaling van skoolgeld aanspraak maak [hierna 'die aansoeker(s)'], ingevolge artikel 39 (4) van die Skolewet, die regulasies wat daarin beoog word én hierdie besluit by die beheerliggaam om sodanige vrystelling moet aansoek doen. Vorms hiervoor sal by die skool se sekretaresse beskikbaar wees.
- h. Dat die aansoeker die beheerliggaam op oorwig van waarskynlikheid moet oortuig dat hy/sy op enige sodanige vrystelling geregtig is.
- i. Dat die aansoeker se aansoek: skriftelik moet geskied in die vorm wat toepaslike regulasies voorskryf; die totale jaarlikse en maandelikse bruto inkomste en uitgawes uiteensit van die aansoeker self, enige ander persoon/persone wat ingevolge die Skolewet as ouer(s) van die betrokke leerder(s) in aanmerking kom, en enige ander verdieners in die huishouding, met stawende dokumente waar moontlik; die bates (teen markwaarde) en laste van die aansoeker moet uiteensit, met stawende dokumente waar moontlik; die samestelling van die aansoeker se gesin moet uiteensit; moet aandui of daar om algehele, gedeeltelike of voorwaardelike vrystelling van betaling van skoolgeld aansoek gedoen word; en elke moontlike tersaaklike feit moet bevat wat die aansoeker ter ondersteuning van die aansoek wil aanvoer.
- j. Dat die beheerliggaam geregtig sal wees om sodanige inligting aan te vra of in te samel as wat na die oordeel van die beheerliggaam nodig is vir die regverdige en billike beoordeling van aansoek om vrystelling van betaling van skoolgeld.
- k. Dat geen aansoek om vrystelling wat ní aan die voorskrifte van hierdie besluit voldoen, oorweeg sal word nie, tensy die beheerliggaam oortuig kan word van buitengewone omstandighede wat die nie nakoming van die prosedure regverdig.
- l. Dat die beheerliggaam geregtig sal wees om die bevoegdheid om aansoek om vrystelling, soos wat hierbo bedoel word, te ontvang, te oorweeg en te beslis, aan 'n komitee van die beheerliggaam te deleger.
- m. Dat die aansoeker binne sewe dae ná die besluit van die komitee skriftelik daarvan in kennis gestel sal word.
- n. Dat aansoeker wat hom/haar veronreg voel deur beslissing van komitee van die beheerliggaam, soos wat in paragraaf 12 bedoel word, geregtig sal wees om binne sewe dae ná ontvangs van die uitslag van sy/haar aansoek skriftelik na die beheerliggaam te appelleer. Die appèl sal nie deur die beheerliggaam van die hand gewys word sonder dat die aansoeker geleentheid gebied is om mondelings aangehoor te word nie.

Uit bostaande is dit duidelik dat u betrokkenheid by hierdie proses van uiterste belang is.

Vriendelike groete



Jan Krüger  
**SKOOLHOOF: LAERSKOOL MONTAGU**



Hannes Gous  
**BL VOORSITTER**



Geborg  
deur:

